

四庫全書

集部

欽定四庫全書

集部

溪堂集卷一至三

詳校官庶吉士臣陳若霖

侍讀臣孫球覆勘

謄錄貢生臣吳壽康

謄錄監生臣張曾壇

謄錄監生臣下爾巖

欽定四庫全書

集部三

提要

溪堂集十卷

別集類二 宋

臣等謹案溪堂集十卷宋謝逸撰逸字無逸  
臨川人屢舉不第然以詩文名一時呂本中  
作江西詩派列庭堅而下凡二十六人逸與  
弟邁並與焉本中嘗稱逸才力富贍不減康  
樂劉克莊作江西詩派序則謂逸輕快有餘

而欠工緻頗以本中之言為失實今觀其詩  
雖稍近寒瘦然風格雋拔時露清新上方黃  
陳則不足下比江湖詩派則泯泯乎雅音矣  
且克莊序中又稱宣政間有岐路可進身韓  
子蒼諸人或自鬻其技至貴顯二謝乃老死  
布衣其高節為不可及而本中東萊詩話亦  
載汪華贈逸詩云但得丹霞訪龐老何須狗  
監薦相如新年更勵於陵節妻子同鉏五畝

疏則知當時兼以人品重之不獨以其詩也  
考江西派中有集者二十四人逸所著文集  
二十卷詩集五卷補遺二卷詩餘一卷尤稱  
繁富今自黃陳呂晁諸家外惟韓駒陵陽集  
及邁之竹友集猶有寫本逸集已久佚無傳  
故王士禎跋竹友集以未見逸集為歎近時  
厲鶚撰宋詩紀事蒐羅極廣所採逸詩亦止  
十餘首今從永樂大典所載哀集綴輯尚得

詩文數百篇中間如冷齋夜話所載貪夫蟻  
旋磨冷官魚上竿之句又豫章詩話所引逸  
蝴蝶詩狂隨柳絮有時見舞入梨花何處尋  
江天春曉暖風細相逐賣花人過橋等句雖  
皆已失其全篇然其存者詩詞約什之七八  
文亦約什之四五已可畧見其大槩謹訂正  
訛舛釐為十卷庶考江西詩派者猶得備一  
家焉乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

--	--	--	--	--	--	--	--



欽定四庫全書

溪堂集卷一

宋 謝逸 撰

賦

雪後折梅賦

耿夜闌之青燈沉萬籟於岑寂忽竹風之聲林顫簷端  
而索索徐披衣而啓戶飛雪花之如席眺溪上之寒梅  
亘千林於一色恐青女之下臨嗔玉妃之墮謫競孤峭  
以相高兩含情而脉脉乃策壺公之杖乃躡阮生之屐

度橫約以躡躡排寒威而辟易繞琪樹之玲瓏攀瓊柯  
之的皪搖踈影之橫斜漾清溪之寒碧披緒風而香冷  
引輕素而烟羃忘凍手之欲龜携纖枝而入室暎几研  
之璀璨藉海岱之玉石寓逸想而自成若憤余之幽僻  
覺毛髮之森竦迷今夕之何夕因燎薪而擁爐泣銅餅  
之唧唧起取酒而自溫傾小槽之珠滴昔花月之成妖  
幻武公而奪魄余少賤而多難豈耳目之敢役徑就醉  
而曲肱吼怒雷於鼻息曉援毫以陳辭紀昨夢之戲劇

弔槁杉賦

井序

臨川崇真觀有古杉焉歲久槁死而枝幹不  
墮俗傳晉魏夫人學老子術於此手植於庭  
不知其果是非也衆謂此杉以槁死得免斧  
斤之厄世莫不幸其生而茲獨幸其死也一  
日郡兵官見而惡之命郡兵伐其枝幹芟其  
本根實以土而夷其庭嗚呼亦不仁甚矣推  
此以往孰謂世之人死而可以免禍耶遂弔

之以賦其詞曰

后皇畀物兮靈衷不私稟受殊氣兮土地異宜芸芸其  
生兮情之不齊嗟此杉兮其大百圍修且長兮蔽乎雲  
霓樛枝偃蹇兮如龍虎之馳植之於庭兮如正人端士  
之威儀挺然獨立兮如不附麗於當時斲為棟梁兮負  
殿堂而不歌剝為舟航兮觸風波而不危梁百步之川  
兮厯千載而不隳今其槁死兮無可用之資不憊於霜  
雪兮無求乎雨露之滋賴根幹之存兮得永託於庭墀

夫何不仁之甚兮肆斧斤而芟夷昔子胥怨毒兮平王  
既死而鞭屍魏公忠直兮肉未寒而仆碑自古莫不然  
兮豈唯今世之可悲嗚呼槁朽兮夫復何疑

感白髮賦

謝子寓居於陳氏之館晞髮於庭童子見而  
笑曰先生老矣髮有白者取而視之信如其  
言深懼湮滅無聞而道不行於世也乃自賦  
以自激其詞曰

余弱齡之多艱兮蓋嘗苦其心志矧思之刻深兮祇益  
戕乎血氣惟白髮之生兮孰不驚夫老之將至年幾有  
立兮竟何補於斯世道若塗若川兮雖勤而不濟茫茫  
無所歸宿兮聖賢何簡予而遐棄蹈前修之軌軌愛而  
不見兮猶彷彿乎夢寐事業不加進兮宜聲名之晦晦  
固欲顯其親兮嗟立身而無地朝夕藜藿之不充兮妻  
子之裘葛不備矧欲行其他兮致當今之平治曷以宣  
吾心之湮鬱兮將轉喉而觸諱聊寄懷於翰墨兮茲亦

不試而故藝字漫滅而無誰語今不若緘滕於篋笥抱  
耿耿之壯懷兮無蒯緱而疾視嗟秋菊之未掃兮俄春  
蘭之可刈悲床下之蟋蟀兮又鳴蜩之嘒嘒何羲和之  
不我留兮馳日車而迅逝吾固知浮沉於閭里兮祇俛  
偃而卒歲非不欲潔已而澡行兮柰託身乎鮑肆日三  
沐而三薰兮常恐同於臭味人生一世之間兮孰不求  
於適意居悒悒而不聊兮徒孤笑而永愜君之閭深且  
遠兮曷不上書而陳事公侯之門高而峩峩兮亦有長

裾之可曳胡不駕言而遠遊兮四海豈乏乎兄弟滄浪之水清兮可以漱濯乎污人之膩望鴻鵠之高舉兮凌赤霄之逸翅聊以快平生之孤憤兮雖星星而不愧蘄有所遇兮又以謝童子之戲

五言古

豫章行

豫章棟梁材託身南山阿王者建大廈匠氏施斧柯萬夫挽不行留滯在河許自非浪滔天何由至王所根雖



埋土中葉已隨風飛惟餘黹下柯那得復相依風吹蕪  
雨打日居復月諸誓朽泥塗間不及櫟與樗匠氏慎無  
悔豫章當自寬人生類如此才難聖所歎

讀陶淵明集

淵明從遠公了此一大事下視區中賢畧不可人意不  
如歸田園萬事付一醉揮觴賦新詩詩成聊自慰初不  
求世售世亦不我貴意到語自工心真理亦邃何必聞  
虞韶讀此可忘味我欲追其韻恨無三尺喙嗟嘆之不

足作詩示同志

和王立之見贈四首

王子遺我詩五言若長城誰謂永嘉末復聞正始聲  
咄嗟千人廢雍容一坐傾端能勵節義何必五鼎烹

蛙蛤沒泥塗鯢鯢游畎澮豈知北溟鯢翱翔九霄外  
長安夸奢子奔走逐冠蓋古寺有佳人幽吟發清籟

按劍毛先生睨柱蘭相如欲市萬世名非由十斛珠  
善養浩然氣外澤心不懼桃花自春風何用賦玄都

鐘鳴戒夜行途遠畏日暮王良鞭驥子一躍僅十步怪  
事書咄咄白髮生故故未暇陳九事亟歸讀四庫

和徐教授與董元達

徐穉卧不起青衫老柴門仲舒著繁露要明王道尊相  
逢非竟日此懷誰與論朗詠鄱陽篇江南烟雨昏

吳迪吉載酒永安寺會者十一分韻賦詩以字  
為韻予用逸字

延陵多賢孫傑然者迪吉上書因自訟賓客禁私覲

目數歸期開口防罰直謁告呼朋儕笑談洗憂感開樽  
青蓮界逍遙以永日翩翩客鼎來草草筵初秩子珍樂  
易人開談見曾臆宗魯與人交坦然無畛域君澤學古  
談論議簡而質伯更廊廟具綠髮居師席澤民泮水英  
每試輒中的叔野飽書史胸中萬卷積文美秉天機溫  
如蒼玉璧文康氣雄豪目睨天宇窄中邦最清修操履  
有繩尺樂之似長康癡絕故無匹坐客皆奇才推鈍莫  
如逸諸人或見賞頗愛性真率不求身後名但喜杯中

物世故了不知一醉吾事畢

謝吳迪吉以麻源桃實法製黃精見遺

平生剛直心真率類狂絞居首富見門肉食亦不飽止  
堂老髮垂喜懼我心攪瘦妻首飛蓬敢謂美而佼婦姑  
宵不寐清餓常至夕幸賴親友人饋送亦稍稍崔嵬華  
子岡秀嶺橫參昴木桃芘菟竹歲永樛枝撓千年採掇  
餘曾近麻姑爪喧喧聲利區獻酌呈獐狔分首及衡門  
古心君獨拗作詩報嘉惠質野言非巧

遊逍遙寺以野寺江天豁山扉花木幽為韻探

得山字

進不驕富貴立朝如在山退若羞貧賤林泉作闌闌喧  
靜本無相了在一念間人皆諳此理何事可作難每月  
一會面十客九不閑良時况易失逝者不復還老境不  
汝貸毛髮半已斑游從皆勝事棲息况禪關茲會若不  
勉對客恐厚顏諸人曾曠達高韻不可攀此意固同曉  
作詩勉我頑

遊文美清曠亭各以字為韻

人生一月間開口笑幾日况復歲云暮在堂悲蟋蟀胡  
不為強歡唧唧復唧唧吾徒塵外姿開懷見真率達如  
商山皓清若竹林逸相逢各拊掌一笑萬事失主人清  
曠士作堂記其實願無負此堂不為勢利怵時時叙離  
闊中散志意畢

懷李希聲

木落野空曠天迥江湖深登樓眺遐荒朔風吹壯襟望

望不能去勤我思賢心此心何所思思我逍遙子掛冠  
卧秋齋閱世齊愠喜念昔造其室微言契名理擊考天  
玉球四坐清音起別來越三祀洋洋猶在耳宵長夢寐  
勤月明渡淮水

送臨川教授葉端仁赴闕

九丸松柏林結根臨古道未逢匠石徒歲久空合抱聖  
人建明堂良才日登造左右乏先容地遙安可到願言  
勵歲寒不改雪霜操



嘉林有石龜眎尾知千齡支床氣愈老巢蓮身始輕鑽  
灼占休咎胸中疑惑明納錫藏太卜決榮安朝廷吾徒  
昧倚伏禍福何由徵

同吳迪吉汪信民遊西塔寺分韻賦詩以荷花  
日落酣為韻探得荷花字

曲肱清夢殘曉鼓喧鳴鼉披衣步庭除白露傾圓荷俄  
聞剝啄聲佳客來相過為言城市喧邀我遊山阿步入  
青蓮界諸峰鬱嵯峨清香郁軟語竟日同婆婆吾人嗜

好僻與世殊，白窠茲遊慎。勿廣恐為俗客呵。

林間露警鶴，城頭日翻鴉。荷香曉逾清，山色秋更佳。寺有老比丘，視世如虛花。茶香語有味，境盡思無邪。夕陽動歸興，天末散餘霞。徘徊不忍去，南樓吹曉笳。更約秋

夜來小船卧薰葭。

二公約中秋夜舟遊南湖宿此寺中

遊西塔寺分韻得異字

天刑不可解，何以補我劓。同訪老比丘，步至城南寺。脫冠飯其腹，咀嚼風雨駛。四壁吼怒雷，稍稍衆客睡。而余

與汪侯敬諮第一義山僧笑不答飲水自知味豈無一  
樽酒把盞得竟醉不知虛靜中自有無窮意賦詩非不  
工聊以助遊戲莫學玉川子弄筆嘲同異

遊西塔寺分韻得溪字

綠篠蒙修塗圓荷媚清溪步屨便清風歛見古招提入  
門眼界淨端如刮金篦升堂各趺坐野語無町畦吾徒  
性真率可追阮與嵇安能觸世網甕底藏醯鷄愛此清  
曠境不知夕陽西歸騎去聯翩城頭烏夜啼

與諸友遊南湖分韻得紅字

不通泮宮籍端居常屢空貧知俗益薄老覺書有功寂  
無裨飯客門前翳蒿蓬平生眼底人粗知吾困窮招呼  
城南遊飯我枵腸空亭午得一飽哦詩和秋蟲捫腹步  
南湖緩帶披涼風漸見波心蓮頗憶新粧紅徐酌穆生  
醴宛如秋露濃三咽不知味百盞無醉容但可勝茶湯  
留餉東坡翁儒生本酸寒獨處罹百凶不謁魏元君粗  
免惡少攻

送鹿好古

邑小民事簡琴樽有餘歡才高氣雖雄心夷神自閑吐  
辭如春風萬象生筆端向識杏壇老不應嘆才難山近  
雪雲密風勁梅香寒銅龍曉鼓鳴畫舸揚漪瀾丈夫重  
離別感慨傷朱顏努力事明主慎勿輕掛冠

送李明道

我老不聞道抱疴卧蓬室有客晨扣門竦若秋山直借  
問為誰何吾祖乃太白傾懷露底蘊始恨晚相得時時

出詩語詞源極端激格律竟不凡窺祖見窻壁飄然別  
我去此道誰知識世豈乏金龜恐無賀賓客

送吳秀才赴辟廨

吾家阿連詩美如青精飯君嘗從之遊臙馥潤青簡我  
老世所憎百推無一挽君獨頻叩門問我句中眼此行  
赴功名舊習暫鋤鏟霜清山驛寒酒醒夜聞鴈挑燈誦  
我詩聊供一笑莞

金谿董秀彥孚聞竹溪六逸之風而悅之作堂

面修竹名之曰逸乞余文表章其義予病不能  
苦思作五字詩以遺之

太白列仙人名綴雲房籍上天官長嚴寧為世間客醉  
揖巢父輩相從竹溪逸朝衫不上船拜舞墮巾幘氣吞  
高力士傲睨天地窄董侯慕斯人作堂榜其壁流俗嗜  
聲利如舐刀上蜜慎勿徇流俗與侯併為七

和王閑叟見贈蕪簡李商老

綠髮工詞章白頭困州縣老氣吞兒曹胸中書萬卷遺

我盈把珠璀璨輝組練何時遊匡廬登堂識君面更邀  
謫仙人共醉山間院願君出樊素可供一笑倩

和洪老贈寂大師

道人居笑庵游戲大海寂鉤深無近用鏡古有精識運  
籌不減良任俠頗如劇未傳東土衣不通左階籍歸自  
丹霞山閉門不浪出室中拂未秉戶外屨已積非關一  
念致要是三昧力疊衾洗鉢外何以度永日孤坐老此  
生恐為世情測談笑作佛事豈不勝佔畢垂手試入屋



貪夫願投壁大木倒百圍山靈不敢惜壯觀佛宇麗鬼  
工莫儔匹衆生嗜利欲如兒舐刀蜜觀此大莊嚴一瞬  
萬緣失何時却閉門養此幻化質老大百不知面帶黃  
瓜色

觀蔡規畫山水圖

蔡生老江南山水涵眼界揮灑若無心筆端生萬怪樹  
杪聳烟鬟雲端懸縞帶繫舟枯柳根茅屋臨清派掃壁  
掛高堂肅肅起清籟君名定不朽第恐鱗素敗

題捉玉軒

劍池渺人物孫子劍池傑身不滿五尺曾次極岑絕客  
來捉玉塵清談霏鋸屑至道初不煩彈指萬緣滅端能  
領此意塵柄行當折對客了忘言真成溫伯雪

題止蘧軒

天籟號萬竅水石相吐吞俛仰一瞬間羣動了無痕乃  
知性分內喧靜本同根君獨詣此理懷抱清而溫談笑  
民事辦庭無鳬鶩喧隱几餞日夕隙月窺黃昏

汪文彬載酒率諸人過予溪堂觀芝草以煌煌  
靈芝一年三秀為韻探得煌字

天瑞必應誠和氣可致祥我如拆襪線平生無寸長胡  
為蓬葦下靈芝秀煌煌諸人喜事者載酒來溪堂環觀  
三歎息作詩助揄揚似聞天道遠吉凶命靡常在德雖  
為瑞無德恐為殃願服朋友戒修德敢怠荒

敝廬遣興

無客且閉門有興即賦詩盤餐隨厚薄妻兒同飽饑讀

書不求解識字不必奇拂榻卧清晝隱几消良時林鶯  
韻古木萍魚闔幽池敞廬亦足樂陶令真吾師

與諸友分韻詠古碑探得羅池廟記以池字為  
韻

德不蓋當代名欲萬世垂刻石期後人石與名俱隳子  
厚名世士投荒死南夷柳民懷遺愛作廟臨羅池韓公  
記其事沈子書其詞韓詞昭萬古沈書妙一時名實兩  
無媿後世傳不疑吾人共閒燕翰墨相娛嬉食不設寒

具玩此前賢碑願作集古錄模楷歐少師

王立之園亭七詠

頓有亭

富貴幻天機  
饑寒撼關鍵  
參前橫利害  
俗眼青白眩  
蘇黃兩玉人  
落筆傳九縣  
向來竄遐荒  
棄捐若秋扇  
王侯介如石  
乃心不可轉  
投之古錦囊  
不遣俗子翫  
近來夸奢子  
嗜好亦稍變  
有客來借觀  
君無唾其面  
酌酒對銀鈎  
吞聲勿復辯

漱醉亭

我家北斗南卜居近山塢浚井得清泉鑿地不擇土京  
城井鱗鱗厥味半甘苦誰知城南園有泉白如乳門前  
車馬喧客醉日亭午呼童轉轆轤銅瓶掛修組漱齒得  
甘涼如風滌煩暑心清談辯駛舌端灑飛雨但恐醉復  
醒君眠客不去

大裘軒

小人拙生事三冬卧無帳忍寒東窻底坐待朝曦上徐

徐晨光晞稍稍氣血暢薰然四體和恍若醉春釀此法  
秘勿傳不易車百兩君胡得此法開軒亦東向蘇公名  
大裘意豈在萬丈但觀名軒心人人如挾纊

冷然齋

枕簟置一榻几杖置一筵掃室淨如水洗心學僧禪何  
必快哉風襟懷自冷然是身豈無垢要以道洗滌儻不  
念清涼恐為煩暑纏雖居土囊口內熱如烹煎我自悟  
此理三伏扇可捐定知與列子相友以忘年

介庵

庵居已是介又以介名庵胡為酷好介母乃在律貪人生要當介君侯恐不堪富貴不相貸安得坐禪龕客去自無事客來不妨談但能了諸幻起卧俱無慙慎勿作住相如繭縛老蠶興來出庵去叢林禪可參

載酒堂

平生揚子雲識字造奇古時有好事人載酒問訓詁君乃貴公子趣向亦如許讀書如鷄鳴勤不亂風雨亦有



問字客携壺就君語君初不作難應答了無忤戶外屨  
如雲作堂蔽寒暑林甫端能來勿與談杖杜

永日亭

靜坐寂無事一日似兩日聞之東坡公此語妙無匹晨  
漱夕曲肱百年過如擲投身聲利場更覺居諸疾而君  
定何人能使義輪軼雖無揮日戈自得魯陽術但見弦  
望移了不記甲乙優游聊卒歲何必日鼓瑟

月中觀梅花懷月上人

梅清不受塵月淨本無垢微風更解事排遣香入牖歛  
思阿明語清與此花偶天資已超軼況得善師友洞然  
曾明白欲掃不容帚客來相視笑不知語出口平生憎  
俗人未語輒先嘔不逢屈突生寧食艾三斗乃知我輩  
中如師亦稀有但想月中梅作詩清如畫

畫詩僧  
皎然也

贈權師

權師純孝人精誠動坤軸廬墓冽寒泉色照師眼綠守  
此不動心種彼無瑕玉湛淨涵一德清涼壓三伏漱齒

回餘甘烹茶發新馥浣衣類面餘灌溉蔬畦足他年功  
用成虹氣森岩谷何時懷壁來不必藏韞匱摩挲壞衲  
中出示老尊宿



欽定四庫全書

溪堂集卷二

宋 謝逸 撰

五言古

夏夜雜興

飛飛空中螢  
睒睒揚其光  
假此寸草資  
乘陰爭煒煌  
膠膠

膠鷄既鳴  
杲杲升扶桑  
神奇復臭腐  
爾生何可長  
零露棲圓荷  
月明清灑灑  
旋轉如走丸  
細碎不盈把  
勁風渡橫塘  
珠璣畢傾瀉  
胡不被蓼蕭  
徽音播詩雅

蚯蚓本微蟲託身在泥滓飲泉食槁壤既飽鳴自恣軀  
小無他腸氣盡聲乃止雖無招憂累奈何聒吾耳

青青棘籬蔓碧色侵琅玕薿薿枝葉茂縈紆矛戟間風  
露豈不佳弱質危難安願言依松柏永與同歲寒

飛蚊鼓翅鳴薨薨喧室中敢憎聲似雷實憚喙如鋒飲  
血雖可飽噬膚竟何功得時不足貴少皞行西風

翳翳庭中草瑣細不可名風來徒自偃雨過胡為青  
夷去根本勿使復滋榮竟無補世事區區何所生

燕燕巢梁端飄搖畏風雨永夜不得眠啾啾子求哺秋  
風毛羽成分飛不相顧慎勿毀其室此室安且固

窓前兩梧桐清陰覆東牆孫枝絡珊瑚圭葉裁琳瑯良  
材中琴瑟幽棲期鳳凰願先海岱貢移根栽嶧陽

姮娥駕望舒餘光粲天步飛廉鼓清籟蕭蕭響庭戶身  
欲從之游悵望不能去哦詩廣九辯庶幾託風賦

送曾伯長

曾侯江南英文章有家法堅壁仁義塗勢若太山壓羣

然過我語如熟得清筴為言行赴官扁舟泛茗雪炙手  
公卿門眼底端不乏吾人儻聞道執圭同荷鍾謂予言  
不信捧盤與君軟

送汪叔野

汪子軀幹小勁氣橫秋霜纍纍諸儒中軒然無老蒼平  
生讀書功短檠照夜窓相從近兩年覺我舊學荒為言  
將遠適隨兄泛瀟湘欲濯塵土心胃懷吞九江願言勉  
此志無為憂患傷待得秋鴈飛寄書來草堂



兩汪皆於菟季也何其怒三年屏鮮腴藜藿未嘗飫鐵  
心不可拗出語等刀鋸貪夫既激昂壯士亦驚顧落筆  
波濤翻可接乃兄武科名蓋餘事文章徒媚嫵欲築平  
生基更師黃叔度

哭陳居士

國欲求忠臣忠臣乃孝子為臣若不忠泉下賴有泚居  
士邱園英叅禪得佛髓家有兩男兒孝秀冠閭里大兒  
守名教小兒飽書史頽然諸子孫眉目皆可喜人言居

士亡居士實不死

翻經臺

吾祖牧臨汝  
滯訟清公廷  
胥吏退雁驚  
踈簾掛寒廳  
鼓角喚幽夢  
草色池塘青  
雙旌引五馬  
駕言出郊坰  
足躡雲端屐  
手展貝葉經  
稅駕妙高臺  
几硯陳軒櫺  
朱墨紛在眼  
梵字森如星  
臺傾人已寂  
聲名藹餘馨  
想公忘言處  
角掛山中廬

三益齋詩

元龍湖海豪蓋代聲籍籍只今觀耳孫才皆萬夫敵叔  
兮美無度伯也古遺直當年種玉翁什襲裝雙壁期公  
垂天雲佐郡試戟翼尚開柴桑徑引領望三益嘗聞築  
燕臺千里走樂劇市骨捐千金廐乘盡虎脊公乃真好  
事展履見逢掖定知子輿輩一笑皆莫逆

遊西塔寺分韻賦詩懷汪信民以淵明停雲詩  
豈無他人念子實多為韻探得念字

昨夜山頭月照我盃漱灩今朝雲外山寸碧若新染人

境兩清絕座客只君欠俗子百無用勝士一可念君如  
茗溪女不粧有幽艷又如白墮醪雖久味愈釀雄文山  
有雲高論圭無玷胃懷極坦夷了不限城塹胡不待明  
光我冠佩長劒寧甘廣文冷青燈對鉛槧何當襍被歸  
莫待孟光寔放杖先生席罷趨邦君玷晚行蟬噪山曉  
起鷄號店到家先過我信若符節驗門前馬未嘶屋上  
烏可占呼兒拂几席喚婦熨襦襜欲具韓子餐恐乏魚  
菜贍但當蒸瓠壺莫笑盧公儉老氣得酒豪灰寒尚復

焰虛心叩至道膏肓待君砭

遊西塔寺分韻詠雙蓮以太華峰頭玉井蓮為

韻探得華字

元君始雲翔華姑繼羽化獨留曾與黎高風配崧華不  
隨二女嬪豈羨兩喬嫁尚餘脂澤念多生緣未謝化為  
芬利陀耦立遠公社翠趺分雙岐並萼肩相亞挹袖薰  
風晨攜手月涼夜交枝艷散霞同氣香飄麝踈影競清  
妍幽姿闕閑暇何時各零落秋高霜露下洗粧見冰肌

乘雲返姑射此論傳者誰黃鵠為予話

遊西塔寺探得王夷甫玉柄麈尾以柄字為韻  
寧馨捉麈手玉色相輝映持賓滿堂韻與談俱勝溫  
潤德堪比鮮潔面可鏡扣几聲逾清指月色彌瑩名壓  
范增斗價重齊侯磬晉朝妙人物此公名最盛風流固  
足賞不救當時病雖云王謝許我老獨不稱肉緩形頗  
穢語拙存直性但慕杜陵翁長鑱白木柄

擬峴臺

耿耿抱孤韻寂寂扃柴扉束書臥環堵交游車馬稀風  
流佳公子妙齡秉天機邀予步層臺目送孤鴻飛山影  
漾清渚翠色侵人衣漁浦晚烟暝霽霧蒙夕暉靜言思  
叔子悵然澹忘歸坐有庖丁手奏刀心術微萬象含毫  
端縑素聊一揮古來勝達士歛如朝露晞吾人各勉力  
毋為鄒湛譏

取友遍四海江夏真無雙憐我守幽獨閉門臥北窓折  
簡呼勝士炊黍羞羊腔相邀出蓬葦登高臨大江江山

擬峴首清絕冠此邦豈惟慕叔子耆舊皆敦龐蟄龍臥  
諸葛雛鳳伏老龐寂寞千載後斯人可心降願言各努  
力勿立僑慢幢

端溪硯

琢彫山骨奇磨礱石發光烟體潤雲氣生寒泉冽幽井平  
生心腹交陳元及毛穎德重不傾側中虛且淵靜置之  
渠几間吾身日三省

吳子珍家分韻詠席上菓探得橘子以橘字為



韻

巴邛清霜後獨餘兩大橘一朝剖而食四老欣然出乃  
知避世士退藏務深密吾邦富此菓味不數萍實堆盤  
爛生光纍纍照巾幘香霧欲嘆人未食先流液何當見  
四老授我隱居術

傷徐文學

鷄鵠止魯郊豈樂太牢具冥冥萬里鴻弋人何敢慕東  
海儒林秀落筆妙詞賦蹭蹬江湖秋低徊老韋布晚從

使者舉捧檄喜而懼白髮照青衫奄忽死中路功名安  
在哉竟以儒冠誤去就各有時壽夭亦無據竚立倚江  
樓注目煙村暮

懷汪信民

長沙隔重湖莽蒼無四壁騷魂駕鬼車月黑陰火赤念  
彼泮宮老官居寄禪寂雖綰叅軍綬尚帶山林色蕭然  
列仙癯粹氣潤圭璧坐見屈在牆作詩弔沉溺鄙夫不  
解事勇退如六鷁安得快哉風吹我垂天翼不假蜚霞

佩置身在君側

懷汪信民村居

金風吐商管秀色浮山椒  
苔乾石骨瘦水落溪毛凋  
埃塵暗復輿風霜縑客貂  
藜羹浥野飯松醪酌村瓢  
會當對榻語竹塢風蕭蕭  
澆腸去舊學詞源湧春潮

送胡民望入京

龜以氣而壽龍以仁而靈  
蛇以無足行蚓以無腸鳴  
大哉天地間百怪不可名  
洋洋西津水念子行西征  
與道

如有聞鴈來當寄聲

寄洪龜父戲效其體

落落匡山老晴江瑩眉宇問道崆峒墟枯槎泛江潯歸  
歟謝遠遊曲肱卧環堵磅礴萬物表動植見吞吐曜靈  
旋磨蟻四氣遽如許咄咄千載事俯仰變今古安得仙  
人杖頽齡為君拄

寄洪駒父戲效其體

令尹吳楚豪奇胃開八窓人物秀春柳詩句妙澄江築

室名壁陰鑿牖延朱光呻吟六藝學心醉倚胡床毛錐  
摘秋穎繭紙截水蒼揮洒有能事著勲翰墨場翼翼魯  
泮宮國士徵無雙行且職教事儒風成一邦

寄徐師川戲效其體

不見徐侯久夢繞西山陽斯人天下士秀拔無等雙捉  
麈望青天意氣吞八荒平生學古功宵次羅典章商畧  
造理窟清論排風霜美筆有佳思哦詩懷漫郎恐非江  
湖客黑頭侍明光不忘溫處士羣書亦可將

懷呂聘君

彼美邱園秀風韻何灑落  
考槃盱水湄貧賤不隕穫  
永  
椀薦溪毛縞衣佩蘭若  
和嶠松森森王恭柳濯濯  
文采  
南山豹野逸青田鶴獨振  
大雅音黃鍾在牛鐸綠蘿  
結  
春陰修篁解夏籜登山挹  
飛溜自得仁智樂賴有好事  
人携酒慰寂寞王度今清  
夷胡為束高閣幡然起東  
臯  
曳裾入西洛且捧毛義檄  
莫躡虞卿屨智囊發新滕  
經  
筭啟塵鑰治國端有計何  
惜萬金藥回睨黃公壚  
負爾

河山邈

八月十五夜與諸友遊湖南翫月

黃昏出東門月在房心間步繞古柳堤踈影迷清灣  
跌坐湖上亭物肅景自閑桂影搖濁醪波光照酖顏  
高懷浩無際妙語險莫攀夜深風露冷投宿敲禪關  
時聞橋下泉泱泱鳴珮環茲遊尋舊約正朔已七頒  
緬想泮宮老邈在淮南山

中秋與二三子賞月分韻得中字

雨洗天宇淨微雲捲涼風今夕定何夕月圓秋氣中驚  
鴈掠沙水寒鴉繞梧桐嘉我二三子笑語春冰融酒酣  
吐秀句醉筆翩征鴻夜闌燈火亂清影棲房櫳似聞霓  
裳曲笛聲吟老龍

遊西塔寺分韻得處字

西風脫木葉感時煎百慮癡坐北牕底哦詩不能句同  
舍二三子邀我城南去風於湖上亭臨流坐箕踞菡萏  
晚紅垂冷香襲巾屨湖西青蓮界竹陰有微路老僧迎



我笑洗鉢供七筯齋厨野飯香園蔬摘朝露清言洗心  
胃幸免盃酒汙人生會合難駛若風中霧明晨想茲遊  
淒涼在何處

懷李智伯以洪龜父贈智伯詩氣蓋關中季子  
心為韻探得蓋字

初聞季子賢詞源漲萬派未倒蔡邕屐先傾程本蓋自  
從得斯人議論頗宏大邇來卧苦塊病骨劇疲瘵茲遊  
獨不預頗覺氣宇隘平生憎俗物每見意即敗後會君

全明先生集卷二  
強起免食三斗艾

卷二

集西塔寺懷亡友汪信民以言念君子溫其如玉為韻探得念字

禍福初無門吉凶本不僭  
跖壽顏夭折此理竟誰驗  
貴不嗇讒邪富獨饒聚歛  
施施驕妻妾百索無一欠  
貞士抱清真藜藿常不饜  
人生鬼揶揄奄忽就窀穸  
吾友汪夫子才力百夫贍  
獨立流俗中如山不可塹  
青衫困冷官半世守寒儉  
自從斯人亡吾生良可厭  
絰絕伯牙琴

墓掛徐卿劍但餘青溪編萬丈垂光焰朝來雨新霽湖  
波清潏灩禪堂淨巾屨僧榻涼枕簟追尋舊遊蹤歷歷  
皆可念矢詩寓一哀苦淚漬鉛槧

和陳倅宜黃書事

鄙夫拙生事日晚兒號冬白駒穿甕牖曲肱起猶慵懶  
情百無營有酒時復中孰知廊廟具征騷犯寒風行役  
豈不苦王事不我容勞佚雖有命造物似不公仰羨冲  
天鶴孤飛邈難從賴有雲外山所至如迎逢是有深

意高懷可默通何當浮大白一醉百念空

冬至日陳倅席上分賦一陽來復探得復字

陽進君子升陰退小人伏此理洞然明不疑更何卜微  
和回根芳餘光借草木但看堂前梅南枝已芬馥東齋  
况虛明樽有荔枝綠燈花不予欺玉蟲間金粟吾道行  
將伸斯言可三復

嘲潘邠老未娶

潘侯平生心初不喜婚宦中年又喪妻二子尚幼孤

燈秋夢寒頗思美目盼初時似不堪既久亦習慣斯人  
天機深堅壁却憂患濁醪只獨斟布衣誰補綻豈不溉  
釜鬻無人煮藜莧買婢供使令頗遭俗子訕北風吹枯  
桑天寒歲云晏人生不百年一世如夢幻勿謂淵泉深  
巨魚亦可汕何當呼塞修便可買羔鴈中饋端有人嫁  
娶豈難辦為君乞樊素伴我老山澗

陳倅席上分韻得我字

竹林牆外梢梅藥簷前朶萬籟寂無聲夜闌耿燈火通

五十二  
卷二  
守塵外姿體道忘人我邀客文字飲塵風清四座酒酣  
誦新詩老氣激衰情公詩如天驥逸韻謝韉鎖小人窘  
駕足十步常九跛願公勤鞭策他年逢飯顆

夜過朱仲觀飲明日雪作

夜飲錦瑟傍歌吹盈耳根歸聞牕外竹撼撼風葉喧夢  
覺室生白曉起欲填門平地委璀璨虛亭舞翩翩灑樹  
輕復揚觸幔急且掀望遠恐連雲積厚疑壓坤光動浮  
屋椽影亂紛池盆散漫迷大江依稀認前村雀噤味自

束鴉濕翅不騫把玩手欲龜咀嚼舌必捫風黨怒未解  
火媒寒不溫簷有水柱懸門無屐齒痕遊倦不訪戴愁  
多惟卧袁何時天宇霽炙背負晴暄王門若可擬持以  
獻至尊

廣壽寺

學道護心城養生戒眉斧靜知世味薄老愜野僧語散  
步給孤園邀我會心侶塵清不眯眼境靜可冰暑蓮社  
宗遠公竹溪仰巢父此道不異世今人豈媿古當念貧

時交重勿棄如土



欽定四庫全書

溪堂集卷三

宋 謝逸 撰

七言古

龍沙詞五疊贈清逸先生

鴈雲蜚兮鯉沉高者可弋兮下可留龍沙之上足以忘  
機兮予以觀魚鳥之情修眉浮空兮鑒寒瀨之澄凝茹  
紫芝兮濯纓逍遙乎龍沙之上兮可樂者山水之情草  
芊芊兮垂柳陰陰黃落兮霜寒露零龍沙之上足以忘

懷兮于以觀草木之情秋風兮月明吹我衣裳兮照吾  
曲肱逍遙乎龍沙之上兮可樂者風月之情百夫逐鹿  
兮失得之營心有鹿兮雖竭蹶其何悲向知鹿不吾得  
兮曾不如其已不吾得則已兮又何有於龍沙之君子  
也

寄題高彥應長官碧鮮閣

竹乃高令  
先人所種

先生手種千竿竹儼如壯士衣冠肅林端結閣挹清風  
閣上幽人峙雙玉春風飛盡玄都花秋霜半落平泉木

試傍池邊訪此君，雪虐風饕不改綠。  
我有惠施書五車，不解子山愁萬斛。  
何時一醉藉清影，更邀明月同君宿。  
汪信民頃赴符離約，謁告還家為盛集。  
戲作詩嘲之以助一笑，仍率諸友同賦。

君如霜鶻精爽老，目睨雲霄長側腦。  
不種河陽滿縣花，手披泮水收芹藻。  
閉門較藝防請謁，門外賓朋跡如掃。  
饑腸得酒吼怒雷，牙頰生煙喉吻燥。  
青燈枕上夢蛾眉，驚魂酷怕寒砧擣。  
縱未休糧僊骨輕，丹田亦合生梨棗。

歸來清狂尚未減懷抱向人輒傾倒不作孟公投轄飲  
乃欲悲吟效郊島明年東風破柳條萬里晴江波浩浩  
此時扁舟挽不留依舊儒官守枯槁只今有酒不浪飲  
迎臘寒梅為誰好相將風雪不饒人拂面飛花故相惱  
期君三日不如盟定作回波嘲拷拷

訪吳子珍新居

歲晚窮愁催急晷吾人學道心如水平共訪延陵李子孫  
呼兒酌酒烹雙鯉新有揚雄宅一區舊聞孟母鄰三徙

卜居清曠慕長統近市喧囂慙晏子但得門容長者車  
何須聲有尚書履他年羔鴈列君庭吉士恐為君子使

送子侃禪師

薛老峯前古游俠脫冠買劍剪鬚鬣閉關孤坐百念空  
面上老色如秋葉飄然飛錫華子岡浪逐西風移步屨  
攝衣升堂槌大鼓是中不賞嗇夫喋四衆圍繞如堵牆  
要觀霹靂飛牙頰人生一夢幾時覺相逢栩栩皆蝴蝶  
何當蠟屐從師遊遮莫馮驩老彈鋏

文軒詩

謫仙獨立風埃外  
函丈席間藏法界  
食前不愧孟子譏  
容膝尚笑陶生隘  
若知北斗可藏身  
定是須彌堪納芥  
不容廣坐九百萬  
誰信維摩室本大

遊寶應寺分詠  
古跡探得顏魯公  
戒壇碑以壇  
字為韻

魯公虹氣胸中蟠  
發為心畫妙筆端  
嚴如禮樂陳太廟  
肅若朝會羅千官  
想見誚杞叱希烈  
不憂米罄無晨餐

曩憑熊軾守此土浮屠受戒陞高壇手磨蒼珉紀歲月  
大書深刻期不刊至今父老見必拜尚餘墮淚碑爛斑  
爭摹墨本走四海購求不惜千金殫掛之虛堂拂塵壁  
凜然六月陰風寒豈惟賊臣斂衽避厲鬼不得神其姦

小說載顏  
書辟瘟

### 送董元達

讀書不作儒生酸躍馬西入金城關塞垣苦寒風氣惡  
歸來面皺鬚眉斑先皇召見延和殿議論慷慨天開顏

謗書盈篋不復辯脫身來看江南山長江滾滾蛟龍怒  
扁舟此去何當還大梁城裏定相見玉川破屋應數間  
寄題黃文昌觴詠亭

門前五柳陶淵明酣卧柴桑呼不醒錦官城西杜少陵  
醉挹沆花溪水橫几杖顛倒盃盤傾似聞殷殷金石聲  
乃知達士未忘情一觴一詠有餘清銀盃落手新詩成  
仰視寥廓鴻冥冥富貴于我浮雲輕興來慎勿騎長鯨  
人言唯君可卿卿



送姜和父

掠眼年光灑飛電三載從遊只如昨似聞買船修水來  
俄見呼童理歸橐酸寒自是臨川尉况值凶年羣盜作  
干戈陌上玩經史金鼓聲中把杯杓上官喑鳴百吏怖  
人皆唯唯君諤諤此行作邑亂山中安得校書天祿閣  
歸謁黃龍老比邱乞取囊中萬金藥吾體潰悶假雙井  
信信致之亦不惡

送趙德甫侍親淮東

茂陵少年白面郎手攜五絃望八荒歌帆側施轉天末  
瞿塘灩澦一葦航向來問字識揚子年未二十如老蒼  
林花蜚盡春事了粲然一笑西山陽幅巾相從竟日坐  
虛堂掃地焚清香人物已共遠峯秀談辯更與薰風涼  
黃梅雨洗天界淨驅車出門指太行朝侯暮烹不足道  
人生離合安得常丈夫許與重氣義兒女惜別徒慘傷  
觀君瀟灑負奇氣恐是天廡真乘黃願言待價無速售  
世間駟僧皆王良

送狄朝議

狄公鸚立橫清秋真氣端能回萬牛平生作郡有老手  
退食燕寢清香浮鞭笞得名亦不惡一官何足償百憂  
豈如清淨政不撓男耕女桑民力優小人瑣瑣不足錄  
惡詩蒙公三過讀自聞歸棹理江干北望傷懷何刺促  
胡不强為此邦留懸知李月當泛菊願言它日持節來  
一洗蒼生愁萬斛

遊逍遙寺詠庭前栢樹以老杜病栢詩偃蹇龍

虎姿主當風雲會為韻得感字

歲寒在天知後凋受命於地稟正獨植枒枝幹撐青冥  
凜然正色不可辱霹靂霽威霜雪避奴視椅桐友松竹  
孔明廟邊凍蟻食御史臺中老烏宿何如結根阿蘭鄒  
葉映高僧胡眼綠楚多榲桲剪伐盡大國要材梁夏屋  
何時匠石運斤風不使龍姿久偃蹇反觀樗櫟老臃腫  
永保天年長受福

送惠洪上人

真淨養兒如養羊敗羣者去羊不傷洪師斗藪疏筍氣  
白晝穴我夫子牆粥魚齋鼓了無碍坐禪不廢談文章  
老師領之笑不語壞衲百孔穿寒光洞庭風號波浪吼  
笑揖逐客談船窓六月赤脚登大庾黃茆瘴裏餐檳榔  
天宮不合囚兩鳥洪徐接翼鳴南昌毛羣羽族不敢喘  
師乃啁哳鳴其旁歛起四明狂客念揚瀾恨不一葦航  
男兒行役良自苦水有鮫鰐陸豺狼何當啖芋撥牛糞  
拗折拄杖掛鉢囊

懷李方叔

儒林丈人稱兩蘇一言為重輕璠璣見君誦詩出險語  
撫掌絕倒徒驚呼貴耳賤目亦不惡虎豹何殊犬羊羣  
勸君掩舌卧衡門莫賦悲秋任搖落

送李希顏

長安少年清似玉腰垂黃金雙鬢綠吹噓氣焰高岑樓  
胡不容公置一足腦脂遮眼卧三年滿榻秋風對修竹  
戶內殷殷金石聲牙籤插架三萬軸箋詩作傳起凡例

公嘗注老杜詩作  
左氏春秋列傳

斷簡殘篇紛在目題輿粵國正秋風

石瘦水清山詰曲先聲霹靂挾仁氣父老歡呼胥吏肅  
莫思蓴菜賦歸歟天上要公調鼎餽

送袁公發

袁公落筆清如風妙齡場屋聲摩空陸沉簿領三十載  
晚節自號無求翁朝廷公卿半親舊誰能挽致青雲中  
參天老栢耐霜雪始知不與蕭艾同俛首下邑亦良苦  
此行定入明光宮

送譚子仁遊太學

沓沓舉子萬馬奔傾動場屋風塵昏失身白袍青幕底  
平生乾沒三家村今君觸熱去鄉縣矯如野鶴離鷄羣  
筆端萬字灑飛電豈畏食葉春蠶喧廣文先生倒屣待  
三舍弟子氣可吞琴書在笥馬在門看看山上復有山  
願君莫忘大刀頭何年駟馬君當還

豫章別李元中宣德

舊聞諸李隱龍眠伯時已老元中少一行作吏各天涯



故人落落疎星曉西山影裏識君面碧照章江眸子瞭  
向來問道渺多歧只今領畧歸玄妙老鳳垂頭噤不語  
古木槎枒噪春鳥身在幕府心江湖左胥右律但坐嘯  
第愁一葉釣魚舟不容七尺堂堂表我今歸卧靈谷雲  
君應紫禁鶯花繞相思有夢到茅齋細雨青燈坐林杪  
與諸友訪黃宗魯宗魯置酒于思猷亭席上分  
韻賦思猷亭詩各以姓為韻予得謝字

我見俗子避百舍一錢不直灌夫罵靈谷峯前汝水湄

誰信無雙有江夏平生眼底無可人子猷粗與吾同社  
故栽修竹共歲寒不與繁花鬪榮謝疎陰時過少陵樽  
斜枝最入蕭郎畫強排風雨作寒聲巧留雪月延深夜  
三伏炎蒸自可逃一榻清涼那肯借願言閑關謝俗子  
勿與此曹俱日化但得風味如晉人縱無此君自瀟灑  
從黃宗魯乞怪石

織女支機棄不用老盧墜腰誰見收君從何處得此石  
恐有鬼物為君偷不堪壓作搗練石仆在牆東如卧牛

何如置我清溪上奇峯翠律臨清流鄙夫鬚髯銳如戟  
青眸皓齒不我儔惟有泉石肯相伴不索吾米無所求  
何時突兀入眼界白頭相對忘百憂

代送柳權郡

河東夫子文中虎筆端揮灑如飛雨餘波覃及百世孫  
翰墨風流照今古文章清麗有典則習懷恢廓無城府  
擁麾山郡民氣和萬頃黃雲富禾黍公餘雅會羅嘉賓  
高論崢嶸揮玉塵皂蓋雙旌別汝江去作他邦民父母

佇看祖席列岐亭梅影橫斜媚村塢定知玉詔下丹墀  
宰府要公調鼎俎

送鄒元佐還鄉

元佐精於命術

白雲英英天末飛紅葉脉脉澗底靜北堂姑老家婦勤  
鄒侯感物動幽興  
顰將平生說詩口試言禍福知天命  
五行推步聊復爾恐君胸中有水鏡

送高彥應

小儒百鳥喧春風大儒老鳳棲梧桐諸生談經用一律

夫子不答如病聾  
廼知胃次有妙理  
此心矯矯誰與同  
臨川決曹亦良苦  
三年掉臂桁楊中  
懸知此行不落莫  
陛下近用韓相公

題許邦基却俗軒詩

流俗紛紛何足却  
爾曹百輩吾能著  
雖同一床各做夢  
政恐不妨人作樂  
俗客自與此君疎  
竹洞何曾有關鑰  
但邀明月對君飲  
莫管門前可羅雀

次張邦式韻

君家劍氣干斗斗焰焰寒光半天倚胡不長攜西入秦  
曳裾侯門颯珠履奈何俛首桁楊間手決大獄如傾水  
不向南樓按歌舞乃提健筆誇豪靡獨步詩壇數挑戰  
雖欲爭鋒吾老矣晚來搜攬饑腸空戲抱添丁玩岐嶷  
蒼頭剥啄叩我門急得長篇驚撫几嗟予敢望幼度才  
哦詩粗可元暉比紫囊成壞本來空心悟香嚴聊爾爾  
君如顰蹙畫眉手我亦閉關防折齒

再用前韻

我家端無一囊錢  
骭髀趙生門可倚  
黃綬叢中識君面  
眼前如見曲阜履  
興來曳杖扣齋扉  
清坐焚香淡如水  
有時造語出瑰奇  
要令墨客皆風靡  
仰觀喬木俯流泉  
因念吾生行已矣  
壹若君才萬夫特  
風儀秀整秋山嶷  
行看待詔金馬門  
安得嗒然長隱几  
功名他日似留侯  
豈與風流京兆比  
昨朝篇末畫眉句  
始悟前言戲之耳  
不如共訪彌天釋  
真成四海習鑿齒

雪

春雲結成三日霖朔風吹作一尺雪紛紛委地玉花亂  
皎皎照戶虹光發一樽相對老孟光寒窻癡坐燈明滅  
踏雪觀梅亦不惡月夜西樓更清絕

歲晚書懷

莫事休休復莫莫草木歸根定搖落窮冬日月任崢嶸  
寒士胸懷要恢廓人言張儀舌尚在我慚祖逖鞭先著  
君如端為梅花歸請脫青衫對花酌



欽定四庫全書

集部

溪堂集卷四至六

詳校官庶吉士<sub>臣</sub>陳若霖

侍讀<sub>臣</sub>孫球覆勘

謄錄貢生<sub>臣</sub>劉錫珪

謄錄監生<sub>臣</sub>黃綸

謄錄監生<sub>臣</sub>范重榮

欽定四庫全書

溪堂集卷四

宋 謝逸 撰

五言律

晚晴

輕雲朝作雨，麗日晚開晴。  
岸草蔥蔥碧，溪流泯泯清。  
沙汀眠白鷺，煙樹嘯黃鶯。  
涉世心無競，支頤眼暫明。

寄李彬

昔日陶彭澤，何嘗見督郵。  
江淮寬運漕，幕府得優游。  
故

舊誰青眼功名要黑頭相思懷抱惡注目倚南樓

客至

曲肱秋夢覺剥啄打門聲鵲噪柳陰亂鷄喧藤架傾寫  
詩無阿買聯句有彌明飲罷各分袂月涼風露清

秋日書懷

驟雨池塘漲飄風枕簟涼野田肥鴈驚官柳噪蜩蟬歲  
月書千古功名酒一觴塵纓如可濯携女泛滄浪

黃通理邀遊南湖

不踏南湖路端居兩見春浮花空過眼濁酒漫濡唇  
杖惟今日開樽有故人何須推物理行樂及佳辰

汪信民載酒令表弟吳迪吉邀予同遊南湖

古人多齟齬吾黨故裴徊表弟邀予出叅軍載酒來南  
湖未新柳東巷且殘梅但恐辟書至將軍幕府開

東府文雖下西津艇未橫莫愁官長罵且伴老夫行飲  
酒舊無敵能詩新有聲此樽誰可使待倩許飛瓊

睡起

地僻市聲遠林深荒徑迷家貧惟飯豆肉貴但羹藜假  
貸煩隣里經營愧老妻曲肱聊自樂午夢破鳴鷄

月夜與兒曹露坐庭中

夜涼雲幕捲人靜華門扃掃葉風生砌鈎簾月可庭秋  
懷因酒壯老眼對兒青遠愧荀陳氏應無聚德星

社日

雨柳垂垂葉風溪澹澹紋清歡惟煮茗美味祇羹芹飲  
不遭田父歸無遺細君東臯農事作舉趾待耕耘

南歸渡江去家稍近喜而有作

晚渡江南岸村村水竹居  
歸心先倦鳥樂事羨游魚  
去國清明後還家穀雨初  
懸知農務急弛擔把犂耜

八月十六日夜玩月南湖用老杜韻

月減一分魄風生萬壑秋  
山烟連野白湖水接天流  
妙語懷支遁清歌欠莫愁  
窪樽聊共酌無羨玉為舟

與宗野宗樸二稚子觀蔬圃

干祿心無競謀生計已疎  
老催吾學圃貧減汝觀書  
細

雨同移菓清霜共挽蔬何時江海去蓑笠伴春鋤春鋤白鷺

也  
閉戶無賓客忘憂賴玉魚

宗野小名夢玉宗撲小名夢魚

迂疎皆識我

貧賤不關渠散步惟荒圃端居且敝廬但知師羯末未可笑宣舒

六言排律

擬峴臺

董奉山中種杏玄都觀裏栽桃清曠孰如此地登臨况

是吾曹城下一江水碧江邊百尺臺高倦蝶舞酣花塢  
驚鷗飛掠魚舫客子自來如燕世事相黏若蠓何當有  
酒徑醉涼州不博葡萄

七言律

潛心堂

潛心便是覓安心立雪何煩問少林羽扇綸巾延客晚  
蒲團禪板坐更深要先舟壑藏時悟莫向風幡動處尋  
試挾孤峯雲一寸與民三日作春霖



和陳仲邦野步城西

寺近仙壇西復西，醉中信足路應迷。  
鳴條風勁凋蒲柳，掠岸雲低亂鵲鷺。  
簷外檀欒森翠巘，門前畧約跨清溪。  
葛巾藜杖真蕭散，何必狨鞍鞚月題。

寄幼槃弟

北闕弓旌未見招，茅亭高卧對山椒。  
詩成稚子應能誦，酒熟鄰翁漸可邀。  
寧似杜陵長蹭蹬，不依嚴武更逍遙。  
細思洗馬池邊路，便是成都萬里橋。

寄徐師川

司業端能乞酒錢誰憂坐客冷無氊相望建業只千里  
不見徐侯今七年江水江花同臭味海南海北各山川  
試問煙波何處好老夫欲理釣魚船

暮春感懷

雨退飛廉決怒雲百花淨盡掃埃塵大千沙界乾坤闊  
一段江山日月新浩蕩煙波鯨海晚瀟騰雪浪錦城春  
誰能獨採南山蕨窻外休呼祁孔賓

送朱世英

妙淨光雲覆八荒，經行聚落得清凉。  
閻浮檀水心無染，優鉢羅花體自香。  
赤舄未容趨北闕，綠槐先已兆東牆。  
應真外見中和色，豈在眉間一點黃。

漠漠薰風錦旆翻，綠衣聊復殿名藩。  
行藏有道朱絃直，表裏無瑕白玉溫。  
燕寢妙香凝碧縷，夜談孤月落金盆。  
試將執拂拈槌手，行秉玄圭侍至尊。

短褐登門每自慚，僅同太史滯周南。  
沉迷晚學三無漏，

懶慢長疑七不堪平日漫懸高士榻此行應共德公談  
滿延之白頭林下有徐孺子龐德公之操他年解組歸來日尚許南榮見老聃

### 懷吳迪吉

朔風吹鬢幅巾斜飯了呼童碾露芽竹影蕭蕭圍我舍  
溪流渺渺對君家古心莫為世情改老眼聊憑文字遮  
安得一蓑煙雨裏小船載酒卧蘆花

### 送汪叔野水芝法醞

屏居不到日邊久安得黃封印赤泥折遍溪堂紅菡萏

釀成湘酎碧玻璃  
洞庭春色名應減  
道院丹泉價益低  
聊挹小樽供壽母  
煩君自注玉東西

用汪信民韻送叔野迎婦山陽

涼月淒風透客衣  
離亭無柰角聲悲  
解圍未設王家障  
舉案先齊孟氏眉  
青眼難兄嗟久別  
白頭壽母夢相思  
胸中若有功名念  
莫待鐘鳴漏盡時

與高彥應司理遊南湖

飛花眯目亂紛紛  
細草裊腰綠映門  
山色入簾清可挹

湖光照座冷無痕  
揄揚春色煩詩句  
排遣愁情賴酒樽  
預想明年君去後  
沙寒竹淨野煙昏

陪通守永議遊鐵山書堂

斬新氣象舊書堂  
堂裏幽人壁一雙  
雨洗花光紅繞舍  
風搖竹影碧含窻  
山橫雲外青螺髻  
樹列簷前翠羽幢  
城上烏啼歸棹急  
笛聲嘹亮月澄江

次王直方承務見寄韻

知君才是出羣雄  
憐我生涯獨轉蓬  
稚子淒涼緣歲惡

鄙夫寂寞坐詩窮百年鼎鼎風埃裏萬事悠悠醉眼中  
幸有孟光堪舉案退居真欲效梁鴻

陪王守遊明水

雨後山川秀滿蹊洞門疑是辟塵犀  
白沙翠竹溪光淨細草幽花野逕迷  
閑步禪林思蝶化倦騎朝馬聽鷄啼  
使君自得真消息祖令須煩大士提

山擁雲鬟掃夕霏千林浮翠髮初晞  
雷音震谷朱輪轉霞影搖空綵旆飛  
曉霧拂襟憐冉弱晚風掀袂愛清微

夕陽樓上吹笳管歸騎遙瞻兩塔巍

同信民出城南訪正叔共約南湖之遊至今不  
果信民即有長沙之行恐遂爽約戲作詩以督  
之

初見南湖凍未消只今流水又平橋驅除臘雪煩梅蕊  
收拾春風倩柳條豈有故人行作別不將樽酒慰無聊  
府中諸史皆英妙早晚相從幸見招

又飲西塔寺遊南湖用老杜城西陂泛舟詩為



韻

未訪稽山棹酒船先尋小有洞中天葛巾藜杖輕軒冕

孟飯盤蔬鄙餽牽巢父掉頭休入海

用竹溪六逸事

焦生雄辯

且驚筵

用飲中八仙事

老僧淪茗供清興旋拾枯松煮澗泉

送梭山朱道人

不隨俗客老塵寰晚節逍遙水石間獨佩藥囊來澤國  
只留丹竈在梭山身如野鶴更無侶心似白雲長是閑  
若見劉仙問消息幸分餘粒及衰顏

次韻汪信民見寄

直道逢人多齟齬  
高懷向我最恢疎  
不貪但守司城寶  
無澤應辭季武車  
池種青蓮看妙淨  
庭栽翠竹悟真如  
何年來過溪堂飯  
小圃携籃自摘蔬

送常老住疎山

師住疎山祇樹園  
卧觀雲氣起江村  
百年鼎鼎春風轉  
一鉢垂垂老眼昏  
古殿橫空森鐵鳳  
夜潭翻浪落金盆  
何時繫纜西峯下  
松栢陰中獨扣門

聞秦少儀病愈

平生四海秦少儀造化小兒何若之端能浸假求鴟炙  
定不泣涕眠牛衣問夢是想理既剖杯中有蛇心不疑  
何時過我舉玉趾不用門生并二兒

遊泉庵寺懷壁上人以徐飛錫杖出風塵為韻  
探得徐字

年少談王陋漢儒筆端萬字壓嚴徐昔為酒客鶯花繞  
今作禪林水竹居賤子已捐干祿學故人休草絕交書

春風縱棹遊蕭寺北望淮山正憶渠

寄洪駒父兼簡潘子真徐師川

洪家兄弟皆英妙仲氏文章獨起予  
天末何人懷太白日邊誰子薦相如  
東湖水落蛙聲窘南浦雲橫鴈影疎  
莫憶歸鴻揮老淚強裁詩句和潘徐

寄徐師川

門外荒園一畝餘長拋筆硯把犁鋤  
天邊風露秋期近海外交遊音信疎  
揚子家貧惟嗜酒嵇康性懶不便書

龍沙江水連天濶尺素何當寄鯉魚

和詹存中種竹

斲地移根未滿林庭前俄見影陰森晚煙漠漠玉雙峙  
夜雨蕭蕭龍一吟勁節扶疎真耐老高才灑落少知音  
叅軍吏隱世情薄只有此君同我心

聞徐師川自京師歸豫章

九衢塵裏無停輶君居陋巷不出遊滿城惡少弋鳬鴈  
對面故人風馬牛別後夢寒燈火夜歸來眼冷江湖秋

馮驩老大食不飽起視八荒提蒯緇

舟中不寢奉懷齊安潘大臨蘄春林敏功

病夫不寐百憂集起視斗柄東南傾山林畏佳萬壑笑  
天地黯慘孤舟橫此身老矣幾寒暑四海茫然誰弟兄  
江西米貴斗三百好去淮南訪友生



欽定四庫全書

溪堂集卷五

宋 謝逸 撰

七言律

和陳倅泛舟寄瑩中德翁印老

欲尋靖節訪東臯，復憶禪翁隱妙高。  
月送征鴻遵露渚，舟隨飛鷺掠雲濤。  
知公氣壓陳驚座，顧我詩慙謝法曹。  
膽落舊聞溫御史，至今蛟獸尚騰逃。

澹雲疎雨暮平臯，樓卧元龍百尺高。  
紅旆已飛居易舫，



赤心寧畏子胥濤但知守道師前輩未忍低頭效此曹  
天遣數公慰人望晚年富貴恐難逃

和陳倅靈壁寄瑩中二首

汴上相逢艤畫橈清愁萬斛若冰消弟兄直諒推三友  
父子公忠擅四朝對鏡如如皆般若開談句句盡參寥  
要知往事多虛幻看取錢塘八月潮

風攪張園萬木搖

靈壁有張氏園

黯然分袂客魂消更無餘念

留胃次但有孤忠報聖朝千里煙波舟泛泛百年事業

古寥寥新詩吟就誰能寫安得巴東遇李潮

重陽示萬同德

晚起無營着帽遲蕭疎霜鬢任風吹病懷王子同傾酒

愁憶潘郎共賦詩

在京師重陽日與王立之飲酒又潘邠老嘗得一句云滿城風雨近重陽

令予足之今二公皆捐館令人心折

寧效騷人餐菊藥敢希朝士賜萸枝

白衣不至慙元亮空對門生與二兒

郊行書事

新新氣象曉懷清拂面西風卯酒醒萬物歸根秋寂寂

大田多稼雨冥冥獨逢隔水一山碧不覺舉頭雙眼青  
預想明年生事足不煩結柳使奴星

次董之南韻

門下遠山膚寸碧堂前溪水半篙深仰看老鶴有清興  
靜聽幽琴無俗音三釜及親君養志一瓢在巷我甘心  
向平昏嫁何年畢杖策長隨支道林

次季智伯韻

薄有田園百不憂詩書自樂更無求形容風月三千首

笑傲林泉四十秋，豈意騎鯨尋李白。  
真成夢蝶化莊周，誰能倒激西江水洗我胸中萬斛愁。

寄饒葆光

先生骨相不封侯，卜居但得林塘幽。  
家藏蠹簡幾千卷，手校韋編三十秋。  
相知四海孰青眼，高卧一庵今白頭。  
襄陽耆舊節獨苦，只有龐公不入州。

和饒正叔梅花

疎影橫斜月色新，肌膚消瘦不禁春。  
侵凌臘雪寒先覺，

漏洩東風信最真  
光滉粧臺人未起  
香迷野逕蝶難親  
飄零點破蒼苔地  
安得靈犀為辟塵

與諸人集陳公美書堂觀雪以朔雪洗盡煙嵐  
昏為韻探得煙字

踏雪敲門媿履穿  
孟公飲我酒盈船  
捲簾光動山人帳  
入戶寒侵坐客氊  
急灑江村迷淨練  
深藏茅舍認孤煙  
明年策馬長安去  
誰念清吟孟浩然

王立之寄書言其子阿宜漸學作詩及問余稚

子夢玉安否作詩奉戲

求田問舍是何時隨分生涯可樂飢夢玉今年初學語  
阿宜他日定能詩兩家子弟俱無恙一體文章是有師  
但得耕桑了門戶吾人不用寧馨兒

復用前韻寄李聲之子阿大

東都曾見汝生時客舍孤吟夜忍飢憶昨能為鸚鵡舞  
祇今應誦脊令詩儻無氣節如元禮便有功名似藥師  
問道若知真理窟且分餘論及吾兒

五言絕句

寄洪駒父

翼翼魯津宮國士  
媿無雙行且立  
教化儒風成一邦

六言絕句

以水沉香寄呂居仁戲作六言二首

紙帳竹窗夜永蒲團  
斐几人閑萬籟聲沉  
沙界一爐香

裊裊禪關

海上人多逐臭水  
沉價不論錢自是渠  
無佛性非關鼻

孔寥天

七言絕句

題疊翠軒

星落江東化梵宮樓臺金碧駭魚龍  
此軒端有南康趣只欠匡廬五老峯

聞幼槃弟歸喜而有作

門前楊柳未藏鴉溪上櫻桃已著花  
午夢覺來聞好語阿連有信欲還家



風雨多年不對床  
便當携被過溪堂  
曲肱但作吉祥卧  
澆舌惟無般若湯

春雪

未放溫風破柳條  
先教庭樹雪花飄  
初疑乾雨從空墮  
不覺香酥著地消

天工不憤小桃開  
故剪瑤花伴落梅  
後夜月明風更惡  
有人無語獨登臺

梅

羅浮山下月紛紛曾共蘇仙醉一尊不是玉妃來墮世  
夢中底事見冰魂

城中桃李休相笑林下清風汝未知本是前村深處物  
竹籬茅舍却相宜

鏤冰疊雪鬪輕盈莫笑肌膚太瘦生底事狂風催結子  
要當煮酒趁清明

暗香疎影渾無賴雨打風吹更可憐嚼蘂但能供我醉  
點粧應是為君妍

楊花榆莢風流淺，穠李夭桃氣味凡。  
只有寒香無俗韻，不煩吹笛惱摻摻。

老大無人伴，我閑憶梅幽意頗相關。  
不如移植溪堂後，免使凡夫俗手攀。

戲題百葉梅花

細朶斜枝惱意香，月明踈影媚橫塘。  
懸知不結青青子，故作無情淡淡粧。

春詞

蒲芽荇帶遶清池錦纜牽船水拍堤好是淡煙疎雨裏  
遠峯青處子規啼

午睡醒來炷晚香麝煤冉冉襲衣裳垂楊莫道無才思  
故遣飛花入洞房

曲闌干外柳垂垂羅幕風輕燕子飛獨倚危樓思往事  
落紅撩亂點春衣

萱蕊梢頭春事休風飄萬點只供愁杜鵑啼破三更月  
夢繞雲間百尺樓

院落簾垂春日長  
嫩晴天氣牡丹香  
細看玉面天然白  
不及姚家宮樣黃

門前楊柳暗沙汀  
雨濕東風未放晴  
點點落花春事晚  
青青芳草暮愁生

城南

院落輕寒猶側側  
園林黃鳥未交交  
韶光幸自無人覺  
誰遣東風染柳梢

長恐歸時已閉關  
西壇雖好敢盤桓  
可憐月夜杉松影

輸與沙鷗野鶴看

和饒正叔碧桃絕句

未折香枝插髻鴉  
月和疎影上簷牙  
詩人莫作夭桃看  
不是玄都觀裏花

梨花已謝戲作二詩傷之

冷香消盡晚風吹  
脉脉無言對落暉  
舊日郭西千樹雪  
今隨蝴蝶作團飛

剪剪輕風漠漠寒  
玉肌蕭瑟粉香殘  
一枝帶雨墻頭出

不用行人著眼看

寄查多聞

誰能貨馬即求船  
分袂都門又一年  
翳翳夏槐連騎語  
蕭蕭秋雨對床眠

大梁客舍雖無事  
博塞歡娛未稱情  
不若夷門搔首坐  
倘逢黃髮識侯嬴

醉中排悶

白髮逢春老更狂  
衰顏得酒臉生光  
旋張裙幄林中醉

不管槐花開後忙

春來莫學虎頭癡  
趁取風光二月時  
剩覓吳牋呼阿買  
醉中準擬寫新詩

溪堂日日春光好  
問柳中丞殊未來  
暫輟老妻棋局手  
白頭相對酌新醅

武昌門外柳如煙  
想見潘侯枕麴眠  
欲借一帆春水去  
江邊皆是楚州船

送曹聖延劉濟道歸宜春



曹劉翰墨有家風不學隨時語更雄  
莫似溪堂老居士十年林下坐詩窮

家在集雲峯下居門前翠竹盡真如  
道人若許通消息邀我須憑雁足書

端午絕句二首

白髮無端種種生每逢佳節只心驚  
老妻稚子知人意但把菖蒲酒細傾

病臂懶纏長命縷破衣羞帶赤靈符  
樽中有酒不得醉

憶着三閭屈大夫

南湖絕句戲高彥應司理

平湖奩鏡淨無塵地接西壇共一雲  
安得御風如列子更邀明月訪元君

野情蕭散不便書老大無心賦子虛  
待借南湖雙鰓子綠荷陰裏看游魚

芰荷香裏文章靜蘋藻汀邊職事清  
若使淵明知此味折腰五斗可忘情

山色波光入座中  
笑談不覺酒杯空  
掾曹莫作刑官看  
兼有江湖隱者風

碧瓦朱甍午影涼  
軟風翻袂送清香  
荷花也似知秋近  
故斂羞容避夕陽

文美約遊南湖戲作絕句

疎疎小雨閣春雲  
步屨輕便不浣塵  
湖上沙鷗莫驚顧  
吾曹豈是覓魚人

沙井泉甘自試茶  
匆匆一飯野僧家  
翛然放棹各歸去

不踏城西晚鼓衙

送王禹錫

江南山水只供愁  
征雁來時正倚樓  
十里珠簾皆可意  
西風吹夢到揚州

西風撩竹作秋聲  
勾引詩人太瘦生  
安得昭華吹玉笛  
滿船明月送君行

哭胡民望

才聞歌板情難忍  
支枕呻吟二豎嬰  
天上樓成邀李賀

山中石老失初平

翻手成文同舍驚長安日飯五侯鯖只因太史饒多舌  
曼倩方知是歲星

金石臺

江邊怪石老嶙峋雨洗斑斑翠蘚紋本是人間無用物  
豈應丞相等閒分

和智伯絕句

平生學道慕裴休投老無心賞莫愁特買扁舟載明月

誰人伴我五湖遊

紅旗黃紙不關身  
世事如雲日日新  
對客莫談非聖語  
人生要醉五經醇

黃四娘家花有聲  
杜陵野老最關情  
恐遭江上春風惱  
豈是哦詩太瘦生

攀條弄藥不須忙  
家有名園飲辟疆  
但得胸懷了無累  
塵中賓主可相忘

夏日

竹風烟靜午陰涼  
飯罷呼童啓北窓  
試拂橫牀供晝寢  
且容幽夢遶清江

夜興

梧桐葉落覆東牆  
院落風清枕簟涼  
夢覺疎鐘鳴遠寺  
一池明月芰荷香

亡友潘邠老有滿城風雨近重陽之句  
今去重陽四日而風雨大作  
遂用邠老之句廣為三絕句

滿城風雨近重陽  
無奈黃花惱意香  
雪浪翻天迷赤壁  
令人西望憶潘郎

滿城風雨近重陽  
不見修文地下郎  
想得武昌門外柳  
垂垂老葉半青黃

滿城風雨近重陽  
安得斯人共一觴  
欲問小馮今健否  
雲中孤雁不成行

送通上人歸上高

復憶敖峯萬疊山  
雲中歸路踏彎環  
霜乾木落重陽後



莫見黃花便破顏

一筇歸去舊菴居卧聽修廊吼木魚寄語堂頭老尊宿

祇題數字答君書

通上人為順老求余作院記

仲邦惠菊花詩以戲之

重九登高折未殘霜蕤猶帶晚香寒莫嫌爛熳開何益  
秀色侵入若可餐

郊行即事

碧浪鱗鱗淺見沙丹楓林裏雨三家舟橫渡口漁翁醉

夢覺西江蘆荻花

